


于文定公全集



穀城山館文集卷二十四目錄

明故資政大夫禮部尚書兼翰林院學士

贈太子少保范文恪公合葬墓誌銘

明故正議大夫戶部左侍郎誥贈戶部尚

書見峰王公暨元配夫人于氏合葬墓

誌銘

明故誥封資政大夫南京吏部尚書西垣

趙公墓誌銘

明故陝西平涼府通判雨田張公合葬墓

墓誌銘

明故朝列大夫山西布政使司左叅議前

監察御史湛明孫公墓誌銘

明故武畧將軍東巖安公墓誌銘

明故勅封孺人鄭母王氏墓誌銘

明故勅封太孺人董母李氏墓誌銘

明故勅封安人蘇母馬氏墓誌銘

明故劉母賈孺人墓誌銘

明故應封宜人徐氏墓誌銘

明故待封閭孺人墓誌銘

亾兄阜泉處士墓誌銘

亾兄太學都講航隱先生墓誌銘

亾兄鄉貢進士冲白先生墓誌銘

亾弟稚川茂才墓誌銘

穀城山館文集卷二十四目錄終

穀城山館文集卷二十四

東阿于慎行著

門人郭應寵編

北海董可威

天中李時馥校

都門李本緯

男于緯重梓

明故資政大夫禮部尚書兼翰林院學士

贈太子少保范文恪公合葬墓誌銘

禮部尚書范公以萬曆丁酉十月丙戌卒於位

訃聞上為震悼詔贈太子少保錫謚文恪遣官

臨祠者再兩曹郎護喪董葬事明年九月十一

日夫人楊氏亦卒伯子茂桂伏闕請詔予合葬  
並祭廼奉宮端吳君狀謁銘以余從公遊久知  
公深也公諱謙字汝益號含虛唐相履冰之裔  
世家錢塘宋元和中遷豫章之豐城凡再徙里  
最後居孝弟坊世以儒顯有仕提舉學錄者而  
封刑部員外郎諱楚蓋則公祖也父諱慶第嘉  
靖乙未進士仕至雲南按察副使先娶於涂繼  
娶蔣生公公之降也太公夢星光滿室知其異  
兆生而穎悟不羣受業如響益大奇之太公之

郎比部出訊晉藩封公計至都下公方七歲朝  
夕哀奠如成人禮太公守蘇公侍祖母於里能  
代承歡嘉靖乙卯舉於鄉卒業南雍旋奔太公  
之喪祖母陳母蔣亦相繼沒哀勞襄事幾於骨  
立隆慶戊辰成進士改庶吉士館師趙文肅公  
殷文莊公深識重之庚午授翰林院檢討先後  
修 世穆二廟實錄大明會典考核精詳體裁  
無爽二史奏成各賜宴賚再進官至修撰中間  
管理誥勅及持節封藩皆以恪慎著聞丁丑分

校禮闈所取多知名士而會里中劉傳兩侍御  
以論江陵下吏公從獄中勞問江陵嘆之公退  
而息於里辛巳內察竟出爲福建左叅議分守  
漳南公夷然就之外謹汎防內理田賦鈎校精  
核宿弊一清癸未轉山東提學副使功令修明  
嚴而不刻捐廩益田以業貧生多所識拔雋茂  
丙戌轉湖廣左叅政督理糧餉條賦役十餘事  
白兩臺行之吏民稱便戊子轉山西按察使備  
兵井陘未上改治汝南盜起皖蕪境中大震備

戒賑荒拊循控制所部無虞庚寅轉山東右布  
政使自壬午更政諸用忤江陵謫者蠟階鵲起  
公獨遲迴十餘年至辛卯始召爲大僕寺卿未  
至轉太常署祭酒事旋充經筵講官進詹事府  
詹事兼翰林院侍讀學士歷禮部左右侍郎會  
有內詔三王並封公階大宗伯羅公上疏力陳  
皇儲已長宜卽正位東宮以繫天下並封非祖  
制也 上悟遂寢俄解部事教習庶吉士端範  
貞軌函文肅然明年 皇儲出閣簡克侍班官

改吏部左侍郎協理詹事府其秋遂拜禮部尚書兼翰林院學士懇辭不允初公侍皇儲進止虔慎壹意調護起居官臣講後常緣飾上旨有所開導至是入辭復進勸勉數十言皇儲改容嘉納目送久之已而東封議起公疏曰本受封先朝其王疑在關白一部酋耳安得援朝鮮琉球例而辱王封且所遣夷使奴也亦不得僣陪臣宴例卽封關白請以所居島爲號而以武臣蒞事卽宴小西飛請於其館毋遣大臣

主也上從公議其後所遣武臣未至迺歸上命科臣往勘公議請罷使停封顯畫戰守機宜便而上以科臣逗遛下詔謫罰並及禮兵堂屬公疏臣叨禮官議事不當獨臣當罷乞宥科臣及諸郎吏因固求去上亦固留已竟罷封使如公議也時上深拱禁中久不出見羣臣公疏請饗郊廟勤朝講正儲位裁章奏皆不報乙未知貢舉廷試克提調官時方修正史公爲副總裁請纂建文本紀復其年號上是



其議下史館秦府以旁支繼統請王其庶兄已  
奉 俞旨公猶執奏再三兩宮三殿災陳修省  
事宜引漢策免大臣故事自劾而勸 上求直  
言補缺官急行取罷稅礦言甚切至廷中悚服  
丁酉滿二品考賜羊酒寶鈔給三代誥大父父  
皆贈禮部尚書翰林院學士妣皆夫人蔭一子  
國學生公在部三年請冊立冠婚累疏未報一  
夕視大工歸燒燭草奏語夫人曰此請不得以  
必爭之寢而痰作夫人與長孫呼醫環救不起

公素稱攝生形神甚王蓋以憂勞病云爲人風  
神瑩朗資性警捷容止甚飾談說纒纒口如懸  
河練核世故於四方政俗無不通曉澹泊寡營  
究心名理嘗讀太極圖說曰此一部中庸旨也  
學以慎獨躬行爲宗未嘗自立門戶天性孝友  
嘗念祿不逮養每逢諱日輒泫然流涕少弟十  
歲失怙撫育勤篤長推故產讓焉博聞善記涉  
獵羣言裨官方技皆所精研爲文溫潤深沉澤  
於大雅不以模擬爲工所著有雙栢堂稿及講

業緒言行於世世家清素門庭如水子孫美秀  
有文束修好禮不敢以貴勢加人其家訓如此  
世謂公經術治行可方古人而有濟時之才位  
遇雖隆未及大政咸爲惜之然其所建白著述  
卓然可傳於後則亦沒而不亾者矣夫人楊氏  
亦邑世家太宗伯楊文愷公姪孫女也父邦爲  
文學生竒其端慧口授內則女誡諸書相攸得  
公歸而克勤婦功甘澹承嘗無不飭慎姊姒大  
小皆無間言太公之沒公在南雍夫人代視舍

玉無違禮而朝夕慰安蔣太夫人撫視稚叔皆  
如公在側也從公京邸每當朝謁視夜夙興飾  
具以俟賓友過從豆觴箴核啐嗟立辦壺政斬  
然里巷女媪無敢窺門及從仕外服肩鑷之防  
益加慎焉三命爲夫人常衣皂綈親御縫紉不  
輟子婦以勞請休顧曰吾樂此不爲疲第吾自  
少至老未嘗一日忘女功懼汝曹忘之也馭下  
嚴而有恩周卹嫺黨如恐不及則終其身與公  
共爲德不衰云雖公羔裘素絲植天性而皇家

學然夫人所以在御而贊襄之者內德茂矣公  
生嘉靖甲午正月九日卒六十有四夫人生嘉  
靖壬辰九月十日卒年六十有七子男二茂桂  
官生娶游氏應天府尹季勳女茂槐庠生娶黃  
氏雅州知州虞臣女女一適新建庠生魏應極  
孫男四炳明娶李氏炳哲娶袁氏炳睿聘黃氏  
皆庠生茂桂出炳文庠生娶熊氏繼黃氏茂槐  
出孫女二適庠生熊起雷李予璜曾孫男三基  
忍德曾孫女三以萬曆癸卯十二月十六日葬

於邑之宣風鄉羅湖之龍口卽賜阡也銘曰

維公之生室耀星光維公之沒象隱文昌其來  
有自去亦有鄉此罕如者則魄焉藏公之德器  
金玉其相公之才藻鸞龍其章內典文史王度  
有煌外敷屏翰我績用彰惟帝乃眷復厥官常  
寅清三禮夙夜濟蹠匡言絃議蔑可殫詳夷封  
有詳國體以康青宮調護羽翼斯張允也君子  
國之棟杗昊所降賚以弼我皇亦有懿配維德  
之行歸於其室雙鈞掩鉉制命在碑華表在唐

東坡山會文集卷之二十四  
繩繩哲胤紛其球琅必百世祀以德無疆謂爲不信視此右方

明故正議大夫戶部左侍郎誥贈戶部尚書見峰王公暨元配夫人于氏合葬墓誌

銘

司徒王公之沒也伯子司馬方開制闔於蜀亟請代而奔歸而會某功晉陟又以國慶覃恩公當贈右都御史比上疏請卹則進贈戶部尚書賜祭三壇將作治兆以二品禮某年月日葬於

城東鄭潢之賜阡先期使季子進士及門布簡請誌與銘誌曰公諱之垣字爾式別號見峰其先諸城人國初始祖諱貴徙新城再傳諱某以施德著事具邑史三傳爲穎川王教授諱麟以公恩累贈戶部左侍郎四傳爲貴州叅議諱重光以勤事死官特贈太僕少卿已以公恩再贈戶部左侍郎又以伯子恩再贈右都御史配劉氏今贈夫人則故所封太淑人也太僕公六子皆貴其次爲公劉夫人之舉公嘗有異兆數歲

蘇坡山館文集卷之二十四  
病瘳已而病瘳久且棄聞雷而蘇太僕公故居  
約日不再食遣公從外家稍昏我菽或兄弟自  
屑麥麩共啖也長從大父邸舍學日有成穎川  
公讀其文喜已而泣曰是兒必大吾門惜吾不  
及見耳嘉靖戊午舉東省高第歌鹿鳴於藩司  
節席心動擬擬彌日夕則太僕公卒之日也明  
年從兄伯詣闕請卹袁州之子徵賄兄弟相謂  
曰卹而以賄非先志也盍且歸乎壬戌成進士  
除荊州府推官比讞精明出以平恕號無冤民

遼庶人橫不奉法有詔雜治御史屬公則繫其  
臣僕助惡者十四人論置重典庶人登郡樓詬  
曰理官敢蔑親王公敬對曰非敢蔑王爲王治  
左右之誤王而負國爾庶人噤不能語計且肆  
毒於公然竟無以中也隆慶丁卯召選刑科給  
事中 穆廟新政疏安民固本四事辭甚剴切  
虜陷石州詔集廷臣議推公所條著爲令尋歷  
禮兵左右禮刑都給事中屢疏時政得失甚至忤  
旨又嘗進聖功圖基命錄宣付史館誠意伯

世延恃才恣肆公露章劾之政府爲解不得後  
世延竟中法削也先是言官某以罪謫戍新鄭  
柄銓欲召還而難公屬所親道意公曰有公論  
在竟不能奪又科臣某者故分宜客也病而緋  
衣走市中突入掖門哭且歌公言此心疾迷罔  
不足深問惟上貸之時論以爲得體新鄭修  
郝華亭諸附離之者扼腕而進公謂朝廷優禮  
元臣請存大體葛端肅公意與公合亟稱其議  
於朝事遂得解在省中四年嘗奉使冊封周藩

又嘗謁告省母至辛未當遷而政府因嚙公求  
所抑之不得則從太僕少卿遷長鴻臚鴻臚卿  
者貲郎積資則爲之不甚以士人任其時上  
日御路門朝儀繁重故以難公公左右陞楯不  
敢失尺寸班行肅如也歷大理左右少卿資當  
開府有兩人在後欲跳而先公皆讓之久次爲  
南京大僕寺卿俄移北寺旋轉順天府尹大修  
學宮及治臺官緹室裁冗濫嚴編審格采珠之  
令復間架之征公私便之丁丑晉都察院右副

都御史巡撫湖廣楚俗剽猾故憚公風裁吏民  
凜凜公益務緩輯鎮靜以時去其敗羣所部寧  
一迄無敢爲奸利景王故宮火守者誣德安丞  
倅從客飲延失且當重比公雪其枉妖人曾光  
謀不軌覺奉詔名捕監司繫治平民毒使誣服  
爲光公疏其非是劾罷監司已而他省得光已  
卯三品滿考受三代誥皆贈中丞官一子太學  
生庚辰晉戶部右侍郎協理戎政明年轉左提  
督倉場壬午三品冉滿再受三代誥乃改部銜

如今稱云時公望實益重倚眷方殷而念母夫  
人老疏請侍養詔予省覲虛席以待者六月稱  
疾請彌堅上乃聽公其時子弟十餘人各仕  
爲大吏而公獨侍母夫人於里諸子若孫以監  
司守令入覲及以部郎出使過家上謁太母車  
騎羅門庭矣母夫人安享榮養年九十乃終公  
自以家門殷盛避不求出優游林壑二十餘年  
無疾而逝海內傳而異之公爲人老成凝重儼  
恪有儀而誠厚易直不爲矯激義有不可則毅

然當之無所撓曲居家孝友一門馴謹有古人  
風諸弟子侄受業家塾羣置斗室常以夜分就  
寢寒則燒茅蕪磚交睫其上聞雞而起月朔都  
試燼香數寸爲度香盡而文不成者殿故自戊  
午後舉於鄉者十四人壬戌而後成進士者十  
人皆公先之也官雖通貴儉朴之性始終如一  
世俗芬華一無所染亦雅無他嗜好子弟出入  
疏布徒行不以騎從自里之役必計日而還無  
取失期年及大耋貌腴神王亦習養生家言端

居寡遊不通請謁嘗著炳燭百警攝生諸錄世  
多傳之修太僕公廟於東莊勒綸音忠勤二字  
爲牘又奉部使公檄建祠西郊別置祠田若干  
春秋萃族修祀講禮因以周其貧乏出入曳杖  
而步晚以未疾時御筍輿入里門必下伯子仕  
爲長吏則勅曰慎哉吏而墨甚於盜也及爲兵  
使備邊當太僕公之故地時以祖德勉之所招  
納屬夷功烈甚著開府川貴便道過省公念疆  
場事殷洒淚而趣之行曰予今非吾有也聞有



經界之役馳書戒曰幸備方部毋輕以朝廷  
尺寸地長戎心第速竣事歸耳其在楚中延諸  
生郭美命與季子同舍美命後入翰苑以文名  
世而季子竟第其式穀而知人如此于夫人者  
邑世家女也父痒生某夙有內訓既歸佐公績  
學紡織嘗至丙夜公侍太僕公於徐夫人從行  
供養惟謹公省太僕公上谷夫人居守公迎母  
夫人於荆母思叔季趣歸夫人亦請於公歸代  
菽水且督諸子學也理家勤儉布素肅然事長

接幼情意周浹皆得其歡嚴於訓子寬於使下  
家有奚奴故仕人之孫一日問而憐之厚給遣  
歸且勅諸子曰夫非紳裾之裔與若等不力學  
行如是矣其樹惇而教幾與公分功云公生嘉  
靖丁亥六月二十五日卒萬曆甲辰十一月十  
九日得年七十八歲夫人生嘉靖己丑八月十  
七日卒嘉靖丙寅十一月十九日得年若干歲  
繼配路夫人某人女子男三皆于夫人出長象  
乾都察院右都御史兼兵部左侍郎總督川貴

軍務娶某封夫人次象賁戶部員外郎娶某封  
某人次象晉甲辰進士娶某女二適某某孫男  
五與耜官生乾出與瑞賁出與齡生員與胤與  
繩俱晉出胤嗣戶部曾孫男二耜之子曰士勳  
官生齡之子曰士瞻徃行備官文史而覩公之  
立朝正色垂紳有古大臣之度心竊嚴之位望  
雖隆用猶未究惜也乃其門中才儁如龍如虎  
幾望江左之族而清風素節濼濼美流光又將與  
漢之關西唐之河東比家聲而程內訓則公所

始終啟佑者大矣夫進而爲士典刑退而爲家  
宗主明德饗天保世滋大以有耀於在昔古所  
稱淑人君子享胡耆而正國人幾謂公與銘曰  
瑯琊之裔遷於桓陽維德長世以發其祥烈烈  
司徒國之紀綱器博而粟質醇以方爰始登朝  
李是南邦彊藩旣服庶獄亦詳黃扉夕拜日有  
奏章所吐者柔所茹者剛周旋列棘勳猷載揚  
都輦之政叅乎趙張滔滔江漢時惟帝鄉化流  
百越風偃三湘出爲屏翰入則天梁國威在營

國命在倉云胡來詗壽母是將九齡燕喜二公  
詎償一門之盛簪笏滿床孰爲宗主公訓在堂  
桓桓司馬遏虜平羗季稱國器仲亦名郎公臻  
黃髮旣頤且康生爲人慕沒思不忘新宮廡廡  
在鄭之潢亦有懿配儀桓埒光自 天子命于  
焉並藏儷德母替彌熾而長六槐之蔭於戲未  
央

明故誥封資政大夫南京吏部尚書西垣  
趙公墓誌銘

東萊有兩趙公長曰中丞公燿仲曰太宰公煥  
皆宿儒西垣先生子也先生以經術爲博士老  
而罷歸安兩公之養四錫爵至尚書且百歲而  
沒朝廷異之使守臣稱制臨祠賜水衡金錢以  
葬葬有日矣以開府胡公狀來謁誌銘行也習  
於兩公而尊慕先生之義固不敢辭誌曰趙氏  
故掖人也上世不著著自禮公禮公生秀秀公  
生惠嘗賜民爵後贈吏部尚書配吳夫人子二  
長者教諭公魏次卽先生先生諱孟字晉臣西

垣其別號也爲人魁幹豐髯瑩然玉映生有殊  
資善記髻則列諸生冠而與兄伯同受月廩諸  
生皆折下之謂兩趙生青雲可立致也然皆數  
試數報罷以明經貢而先生得禹州訓導模範  
甚修爲諸名公所重御史行部校文得先生卷  
驚曰此無負諸生師矣再試又再報罷擢諭洧  
川洧川禹州旁邑也然士不登藉且數十年先  
生愍之簡其髦俊日夜程督兩公趨庭參焉洧  
士丞丞嚮學有申范二生皆成進士而兩公歸

試東省亦同受月廩如先生兄弟時也語具禹  
洧志中嘉靖甲子仲公先舉於鄉先生自免明  
年仲公成進士授烏程令其後召入爲郎改御  
史而長公第辛未由吉士改御史兄弟同時居  
臺各著風裁而先生亦受御史封季君又舉省  
試門闕益盛先生顧退然若不勝者長公官至  
中丞仲至尚書而先生年八十餘矣兩公迺出  
迺處以安先生又十餘年乃皆請告不出而先  
生顧益甚健日從二三長老進釀飲食博塞浮

素坊山館文集卷之二十四  
白爲歡歡如少壯獨不喜褻章服出見官府部  
使長吏及門修謁如家人禮亦不往報學官正  
憲老席官師弟子奉書伏閣拜請勉爲啐爵後  
竟謝之其時夫人年亦八十餘兩公旣歸携諸  
孫曾朝夕娛侍融融樂也久之亦厭出遊乃命  
築室二第之間以雙童侍焚香宴坐時召前兩  
公舉忠孝大節爲論及爲諸孫談說經義刺刺  
不休素髮朱顏飄然如仙其氣骨爽伉大孝不  
衰蓋天授也性篤孝友念二親早世思慕終身

比封尚書祭墓猶伏地嗚咽爲孺子泣與兄伯  
俱罷博士白首相從睦而能敬服食儉朴無所  
紛華不以貴故易操年至上老遇後生小學皆  
與均禮一門福澤海內無兩未嘗有栩栩色稱  
曰吾何知盛往遊學椽請數斗自食聞仲子一  
第遽掛冠歸豈直憚折腰乎造物忌盈吾不欲  
取多爾其戒滿如此先生初封御史後仲公爲  
廷尉少宰兩進爵如其官及爲太宰考績先生  
遂進今稱配至夫人而長公官列九卿不得重

封獨以爲歆然人益以是羨之先生平生少病已而微患痰嗽兩公和藥以進輒卻不御曰百歲老人尚何須此呼謂兩公吾夜中目光炯炯見有甲騎旌幢絡繹而至此爲何祥兩公聘不敢對先生因索筆題偈多達生語昇入正寢猶咲謂是何執輿者屢屢貴人也寢疾六日而逝萬曆癸卯三月晦日也距生正德丁卯閏正月十六日得年九十有七歲初配張氏某人女贈恭人繼配孫氏某人女累封夫人子男三長卽

燿都察院右僉都御史娶馬氏累封恭人大使守成女次卽煥南京吏部尚書娶錢氏累贈夫人教授好學女繼周氏典史廷楓女繼方氏累封夫人叅議岳女次燦癸酉舉人娶王氏教諭錫臣女俱孫出女七一適徐仲春張出一適秦旰一適諸生林應鳳一適河間府通判崔校封孺人一適錦衣衛經歷錢一鶚贈宜人一適訓導王瀾一字毛弘烈未娶卒俱孫出孫男六胤昌廩生娶毛氏同知似荀女壽昌庠生娶毛氏

東坡山館文集卷之二十四  
同知似蘇女燿出祐昌官生娶徐氏知州詔女  
煥出宗昌庠生娶王氏庠生鈞女禧昌廩生娶  
楊氏推官耿光女履昌生員納級指揮娶孫氏  
知縣登雲女燦出孫女一適太學生劉兆熊煥  
出曾孫男十曾孫女六婚俱士族予嘗爲先生  
祝辭謂累朝大臣舊老多有高年之養與先生  
最似者安福王氏兄爲太宰弟爲大司寇封公  
受命於朝扶掖入謝江右盛傳說焉又數十年  
而得先生云王氏封公壽筭不知何若又不知

偕老與否及二公侍養何狀度不及趙氏全矣  
至如兩公清慎端方爲海內所嚮慕崇名瑰節  
輝映圖史有不在穹顯者豈今人所可幾及哉  
夫祿位與壽其欣艷在一時惟名不可朽耳以  
是年十一月八日葬於城北郎子埠之陽銘曰  
此巋然者封也公衮之錫匪其豐也期臺之筭  
匪其穹也是式毅者兩公厥稱雙壁光斗虹也  
塤箎更奏亮天工也疇且爲西京之萬石疇且  
爲東都之太丘其惟翁也此儒者經術之効而

嘉靖山陰縣志卷之二十四  
十九  
名與天壤終也

明故陝西平涼府通判雨田張公合葬墓

誌銘

雨田先生者清源高節士也諱鯉字爲龍其先  
江西泰和人五世祖諱克榮賈於大明之李家  
口卒葬其地有子諱機徙家臨清機生二子次  
者諱錦嘗爲杭州幕史生處士淵室於吳氏則  
先生父母也先生生而氣姿不凡八歲能文文  
有奇氣先正林霜栢公時以建言罷歸見而異

之引置門下親爲授經年十三學使王遵巖公  
取補邑庠及引見則驚曰乃稚子耶他日必成  
大器不忍玩以青衿賜花幣而遣之又越三年  
乃遊鄉校從諸生試數冠其州彙而試之又冠  
其府諸生則鴈行避舍矣戊午入闈分考欲以  
舉首御史亞之力爭不得請曰以須異日出則  
訪而勞之辛酉都試爲劉漢樓先生所知取置  
高第然於言易猶亞公太史也先生嗜書好學  
於百家諸氏無不涉獵至爲制義焚膏十夜衣



崇城山館文集卷之二十四  
二十  
帶不解然十上春官竟亦不第嘆曰人也奈何  
違天乃謁選得新安令上日揭人我二箴以明  
其志爲政敦古教化耻言刑罰惟遇大猾鉅宗  
輒董以三尺不少假貸邑民李應曾爲左道惑  
衆聚黨可數百人取其渠拯之諭散其黨大豪  
李九錫椎埋爲奸覺里貴人或爲之地先生謝  
不敏竟以法戍之民有孝悌篤行優之冠服使  
以月旦讀法敷衍 聖諭因命童子歌皇華蓼  
莪棠棣雞鳴伐木五詩而退卽有以不孝聞者

跽之諭所三日而遣之不悛則刑大修文廟益  
市學田購古文籍五十餘部貯之學宮擇邑之  
髦士羣而肄之官日給筆札饌食月再試而甲  
乙焉納賦以錢代銀令不得羨贖罪以穀代錢  
令不得藏多置牛種開墾穀土流亾復業者可  
千餘家其實政精心不爲文具率若此士人之  
裔或鬻鬻不冠於伶取而藝諸墓封牲以祝有起  
胥史爲廉吏者特爲立祠且作傳紀之他所旌  
異貞烈暴白冤抑皆此類也然先生性好勤民

而疎於事上暑月循行阡陌問民疾苦不自知  
勞候人告客至則憚於罄折或不出見厨傳車  
馬又多裁省過客不能無望監司或謂先生直  
指報代是將薦君於朝先生弗應也令伺旁邑  
之政亦不輒報曰比肩子民不願以身爲宰上  
官頗不悅之延禮士夫擁篲奉席甚恭及請問  
有言則掩耳告遽士夫亦有怨者二年而以別  
駕行也父老守白兩臺請以新銜借留業許且  
疏則已掉臂西入關矣韓國之宗衍而不馴治

粟之吏苦之先生每當賦祿延王官賢者一人  
與視關石又請宗室賢者使分給之官無與也  
諸宗心服頌聲滿耳居五月而乞骸諸宗且爲  
白王具疏保留先生又掉臂東出關也先生爲  
人倜儻濶落不修小文而狷潔自高亭亭物表  
視流俗若將浼焉非其道義一介有盟平生不  
手一錢見輒掩面曰目中無阿堵物富人賈子  
操金珠錦綺求一赫蹏終無所應執親之喪倚  
廬三年不入內室年垂八十逢二親忌日酹而

汎瀾裔焉兵道李公除舍請授子經以親服辭  
李公迫欲得之許以練衣出入然後應命其守  
禮不訕如此歸自關中買一小艇列圖書綸竿  
其中扁曰觀魚時從生徒十餘汎流嘯咏若有  
適也東郡守性宇王公大修郡乘延中丞聊城  
王公與先生爲政飲上老於府庠請爲祭酒皆  
曠典也清源五方都會俗尚龐雜先生近市而  
居閉戶宴坐如逝空虛或召之酒常謝不往卽  
不得謝聞有聲伎又避不留溽暑端居衣帶不

解曰室有圖史聖賢在上其莊如此郡中旣寡  
交遊惟與荏平孟我疆符卿相從談議及令新  
安又與孟司諫雲浦相得而王中丞公素慕其  
行晚節乃交之云所著詩文及村市錄類錦編  
五經微言讀易的見及六子註諸書束以示二  
子曰此而翁所積金也其敝可以覆瓿幸善守  
之先生少時癯病狀類老人及年七十以往健  
而肥澤更類少年其善養也沒時亦無大病寢  
四日爾配王氏某人女法稱安人歸而不逮先

姑攝於庶氏庶氏虐之奉事彌篤有子婦禮庶  
乃大歡代先生視產早夜拮据一縷一粟無不  
祗慎曰以成君庶里婦會集競爲麗服安人以  
布素叅之伸色彌泰其相先生所以最勸尉勉  
皆出世俗先生莊之謂爲知己友云先生生嘉  
靖乙酉二月十七日卒萬曆癸卯七月四日享  
年七十有九安人生嘉靖甲申十月六日卒隆  
慶壬申七月十三日享年四十有九子二俱安  
人出長爾範州學生娶郭氏處士志魏女早卒次

爾綱歲貢生經行甚修里稱端士娶邢氏叅政邦  
女女三一適州學生郭光祚嘉祥教諭汝梅子  
安人出一適歲貢生章舜臣太醫院吏目甫子  
一適府學生曹標封侍御大瀾子皆側室孫出  
孫二長斐然範出娶王氏處士應麟女早卒次  
煥然府學生亦雋才也綱出娶劉氏省進士爾  
礪女孫女一範出適王有澤省祭官舜臣子曾  
孫二啟胤昌胤俱煥然出爾綱卜於某年月日  
啟城東南之兆與安人合遣子奉書求賁其墓

中之石行自垂髫偕計從先生遊見目為忘年  
 友迄今四十餘年道義之交始終不渝蓋深知  
 先生之操行而心誠服之惡可不為銘然先生  
 之卒門下諸生方將列其名德請於所部祔食  
 學宮他日必有為之勒碑若郭有道陳仲弓故  
 事者余姑誌其坎云爾銘曰 世也則滔滔爾  
 里也則嘒嘒爾彼美君子則胡嘒嘒爾寥寥爾  
 其遇也陶陶爾其適也尚表曰高士之阡千秋  
 一日則昭昭爾

明故朝列大夫山西布政使司左叅議前

監察御史湛明孫公墓誌銘

公璋玟字玉耳初號淇陽再號湛明其先武城  
 人也始祖好古徙家平陰好古生興興生孜孜  
 生廷訓廷訓生德良公父也凡有六子而公最  
 少生而穎異書過目輒成誦居恒危坐正襟識  
 者知其大器年甫十餘太公先沒母王孺人亦  
 卒家無遺產孑然孤也范氏姑憐而時存撫之  
 婦翁牛公司訓大城獲鹿召公居館與兩邑名

士修業文聲益起歸補諸生試輒傾其曹耦邑博錢塘許公見其文詫曰咄嗟此佳士也行魁天下矣萬曆癸酉舉於鄉公車報罷益攻苦爲文夜讀書至達曙以爲常友生旦訪猶見孤燈熒然庚辰遂以尚書舉進士第七人出太史金陵余公之門聲稱藉甚筮仕錢塘錢塘兩浙首邑臺司星臨其上什九在塗什一在署還至而應之裁決造請綽然有餘以間蠲煩苛崇實政調停里甲挈爲永利邑人藉以休息均田議起

部使屬公躬履畝而度之不旬日竣翕然稱平均旁邑之田亦如其邑兩臺疏得紀錄已復修鎖澗橋鎖澗橋者卽宋蘇公堤也迄今六百餘年日就圯廢至是庀財賦工不勞而成屹然爲湖中巨防矣壬午武林民亂倉卒聞變挺身往諭衆初刃而環公已有從火光中識公者曰此非錢塘青天使君耶是但飲西湖一杯水爾柰何驚之則相呼解去公因嚴部署畫方略待銅梁司馬入亂者遂定以公先期安輯故也朝議

并錄公功甲申考最予父母錫皆如公秩癸未  
丙戌兩入計以卓異聞有詔召入拜四川道監  
察御史巡視中城草場災馳至禱風旋止故時  
江南民運有藉詳總而略分頗滋奸弊公巡光  
祿請均署催僨者職名以便稽核部覆如議中  
州饑民相食疏發臨德倉粟數萬石賑之復勸  
上畏天悲人清心寡欲爲弭災根本娓娓千言  
已丑請告歸里辛卯起補江西道時部使交際  
糜濫屢掛白簡公奮曰過流不若澄源請令兩

臺大使毋得私相問遣藉墨吏口違者臣等劾  
狀疏上報可是冬出按陝西入境聞寧夏變邠  
乾之間有白蓮社謀爲內應公先捕其渠魁卽  
馳按寧州寧故無井取水數十里外公曰虜脫  
圍城城不攻困矣乃下令浚井闕地得水水甘  
而洺州人神之總兵李胸禦虜數敗劔而督府  
庇之御史大夫亦爲內援公獨疏劾罷胸而薦  
葉公夢熊可代督府副將蕭如薰爲帥後賊平  
卒用此兩人力也當羽書旁午時指麾邊事衣

東坡全集卷之二十四  
二十七  
不解帶者數月兵有次第乃以病請大夫啣公  
疏覆許歸終不與平賊賞人有問秦中事者公  
亦舉手謝之不自明也甲午起補江西道朝議  
倭夷封貢公乃言非是且請更置一人大將部  
覆不能無相左其後公言竟如券已按順天貴  
戚歛手長安道上望見孫御史驄不寒而慄天  
津造備倭船以計部郎某督之郎反與主者乾  
沒為奸利以相國肺腑交莫敢詰也公竟按奏  
郎相國啣公又豐潤令貪而酷亦有與主屬撫

臺陰護之撫臺密以語公公不顧也竟用惠文  
彈治且言吏治民生之本今長吏鑽刺成風浸  
不可問民何以安請嚴禁上疏止雖得 俞旨  
而謀去公者益力遂出為山西左叅議分守河  
東衆頗不平公慨然就道聞西警至即沿河修  
築墩臺為防禦計會天大旱躬禱輒應河東鹽  
池久且壞與臺使決筴大加葺治工竣紀錄時  
礦稅初起貂璫大橫公首嬰其鋒稍稍戢服所  
部無擾銓曹推陞憲副四以名上公見時事漸



難不樂久仕再請乞休部覆稱其清直可大用  
詔特予告俟痊召復云公為人端恪謹嚴好修  
尺幅不肯與俗浮沉雖時見謂高簡而中實誠  
厚無他腸蓋慤士也居官廉儉歸橐蕭然既疏  
禁餽遺兩巡大部贖鍰一無所取於境內士人  
亦不修式間之禮河東入賀嘗卻路費千金皆  
人所難前後請告里居十餘年閉戶課子坐臥  
一樓手不釋卷尺牘不入郡邑家人生產亦鮮  
營殖惟好獎進後學周給貧乏常議建文館義

倉爲邑永利其砥德修名晚而彌篤如此病且  
革猶起呼而索豸繡云夢之帝所還我御史則  
公始終真一御史矣公生嘉靖辛亥七月二十  
四日卒萬曆甲辰十一月十四日得年五十有  
四先娶牛氏教諭利仁女贈孺人繼娶鄭氏庠  
生璧女封孺人子男一振圖邑庠生娶趙氏叅  
政雲翔女鄭出女三一適邑人庠生何恪子可  
量一適翰林院博士孔貞寧子尚達牛出一適  
邑人恩貢梁士光子應輔鄭出皆庠生孫男一

光鼎聘東阿庠生孟某女振圖出予與公邑居  
相隣平生稱莫逆交振圖遊予門下翩翩國士  
也將以某年月日奉公葬於某地先期自爲狀  
請銘銘曰燁燁南宮寶璠瓊嶽嶽西臺風霆驅  
騰騫天路誰軼諸促馭太息使人噓詎知乎鳳  
之雛龍之駒佩陸離轂丹朱吁嗟乎此其爲侍  
御湛明君不礎之居

明故武略將軍東巖安公墓誌銘

武略將軍安公者其先山東章丘人也始祖諱

祥以尺藉從 文皇帝有軍功授大寧中衛總

旗遂家京師祥子榮得以平寇功陞本衛百戶

三傳而及武略武略豪俠長者也疏髯廣額器

宇卓犖慷慨有大節家嘗中貧從事賈易供大

人滌髓以其贏餘振貸貧乏無所恹惜承父志

也居著日盛以貨豪長安中矣然其爲人儉朴

居常食無兼味身無文綺而冠婚喪祭動循禮

法都人俗尚侈靡喪用浮屠及聞安氏風多改

以從禮者語在都城東隅傳述中武畧既承世職

世廟覃恩晉秩騰驤右衛千戶典禁兵宿  
衛主帥慕其名行推轂爲中軍旌旄節鉞凜然  
生色禁衛爲之一清御史改令領屯屯地在三  
輔民多匿稅不能充額武略調停盈縮屯民便  
之逮課稅時大家車牛小家負擔稅無逋者其  
有幹局如此諸知武略者以爲材任大將已而  
年漸高歎曰吾產足自給終老而役屯卽勞見  
筋骨祗爲他人唾夫鴻鵠九天鷦鷯一枝適所  
志也吾奚以官爲卽日解冠著山人衣優游家

園親戚中老無養者奉以縑帛幼無怙者濟以  
資財務令各得其所而族譜義田之立有足述  
焉日復跌坐小室服无養真簡飲食節嗜慾游  
神冲漠有至人之訣居常勉其子署丞曰吾襲  
先人業殆四十餘春秋閃閃爍爍如凄風撼燭  
日靡公廩而寸衷未効今已矣夫爾曹苟沾一  
命卽戮力一官受直怠事非吾所願也絕口不  
談家事而吳氏安人雖聚首皓白不廢巾櫛室  
無女侍夫妻相敬儼如嚴賓此固武畧之刑于

而頽藻鷄鳴之賢安人殆庶幾矣安人先卒三  
年武畧以老病臥數日竟不起署丞將以今年  
十二月二十四日合葬於東直關外八里莊之  
兆奉大理丞洪公狀請銘予與安氏有鄉曲之  
誼識署丞賢與之遊誼不容辭武畧諱寶字國  
珍東巖其別號也生正德辛未卒萬曆己丑享  
年七十有九安人生正德庚午卒萬曆丙戌享  
年七十有七子一節臣上林苑監署丞娶錦衣  
戶侯韓銳女孫二長仁順天庠生娶諸生魏聞

善女次位聘錦衣撫軍李登雲女三尚幼曾孫  
一亦幼女三長適諸生劉第次適錦衣王卿三  
適太學生楊承恩先卒孫女一適大理寺丞洪  
聲遠子惟耕銘曰 於鑠將軍實司禁衛克堪  
厥家以光而世明祭有懷忠貞自誓雖饒於貴  
不耽於利芥視塵塋蟬蛻世味宛彼安人先公  
而逝穀則同室歿室非異子孫繩繩誕開來裔  
萬祀千秋綿綿勿替

明故勅封孺人鄭母王氏墓誌銘

元年夏侍御鄭君告滿詣闕史于生告滿亦至居一月所鄭君奉命出按江南去一月所丁母王孺人憂委使謁于生志墓以大叅王公狀大叅公者故亦爲御史孺人同產也而于生與鄭君同遊翰苑驩甚卽不佞無能文敢不敬諾志曰王孺人者封御史鄭公配也鄭公諱汝楫自號樂崑處士孺人父曰順菴翁璠以子贈御史母曰申太孺人兩家皆魏人也孺人生而穎慧又沉雅不妄笑語居常婉婉性朴不好竒麗順

菴翁心竒之知其貴徵順菴翁授小子經孺人常竊識之往往通大義母有少女而愛簪珥被服多所陰厚或以謂孺人笑曰吾豈以簪珥故傷母心竟不問孺人旣歸事夫君唯謹公家四世同居上奉大父母次乃姑嫜日夕上食唯謹中多姊姒恂恂退讓以身下之亦唯謹相以內舉稱孺人賢也孺人有兩子絕愛之然課之甚莊常夜績不寐攝兩子讀書其旁間謂侍御曰自予兒時處閨中見爾舅讀書狀苦矣迺其後

爲御史光顯假不勤安所取此孺子念哉其母  
負外家聲夫學書不成分當老田舍田舍兒者  
終歲操作偃僂汗邪以祈升斗則孰與業儒難  
侍御跪諾以故向學有聲第戊辰進士選爲翰  
林吉士拜今官如舅氏始侍御按貴陽而孺人  
病遂上書請告侍孺人壬申 天子卽位上兩  
宮徽號覃恩孺人聞之呼侍御曰吾聞覃恩者  
近臣得封父母何不強爲我出侍御瞿然曰唯  
立起馳入見詔天官內史以璽書封御史國仕

父如其官母爲孺人侍御朝服拜受詔旋有江  
南之命將發聞孺人病亟假道馳七日至魏面  
霞裾玉佩跪進之孺人前孺人目之喜已又出  
制詞讀之所以獎借甚備孺人聽之又喜已而  
悲曰嗚呼吾迺得榮寵如此死可矣然吾攻苦  
育爾等終身同井爨母效薄俗斤斤分產侍御  
泣而受命越六日遂卒時萬曆元年秋七月十  
五日也距生正德二年八月十六日得年六十  
七歲子男二長卽國仕娶武氏封孺人次國華

太學生娶段氏孫女二初孺人病不飲藥大叅  
自和藥以進孺人謝曰弟休矣矣生命也藥豈  
益於數哉銘曰 蔚彼南山有鳳林誕生鸞鷲  
羽振振五靈畢脩炳其文負圖舉翰戾楓宸西  
翥于臺聲噦聞泰階既平嘉瑞臻象彼吉士爲  
國珍龍光燁燁寵良臣金繩玉檢出如綸認哉  
哲母聲無垠在河之陽馬鬣新有碑螭首何蹲  
蹲龍文鳥篆垂千春誰無歎者嗟孺人

明故勅封太孺人董母李氏墓誌銘

李太孺人者贈霍山令西村董公配也贈公卒  
二十有八年而伯子淵以郎使過家始葬公於  
城西之兆又越六年而太孺人卽世奉以祔焉  
以予同里舊知遣子乞銘按狀董李皆長清人  
贈公父曰文學公銓太孺人父曰博士公儀同  
爲諸生相友善也博士公有丈夫子二長者爲  
殿中丞良女子子三少者爲太孺人太孺人生  
有淑質父母絕憐愛之相攸得贈公歸而家徒  
四壁許大恭人恐其不堪也則前謝曰以母命

出事君子椎衣操作分固甘之無念兒爲上奉  
尊章下相夫子婉順祗肅無貴家態宗黨翕然  
稱焉公有二姊而貧姑氏日夜念之無以贍也  
太孺人從容謂公以吾母之念女旦夕置饋姑  
於二姊何若而令舉箸踟躕若有所顧養志謂  
何以母家所饋問遺二姊無不興也而姑氏益  
歡公旣罷經生業取什一自給太孺人躬刀尺  
纂組佐其不給終無難色其侍舅姑之疾色憂  
如子居舅姑之喪致毀如子益以孝聞矣伯子

生而數有奇兆太孺人內喜說公曰君業以早  
孤廢學兒幸有資當成君志簪珥布襦可以供  
修幣者吾無愛也則遣就外傳日暮罷歸輒取  
所業覆按必中程而後卽安蓋太孺人雅通經  
義能書故代父訓如此贈公病太孺人手藥與  
食而進焦妍如削夜則露禱於天請以身代旣  
絕三日不食伯子長跪泣曰母何爲若是兒幸  
而執業學宮未得博一第以成母名卽二弟孱  
然未立將安所托命其以報先人地下也太孺



人爲強進七箸曰嗟乎兒能勉立身名以顯而  
父吾恐死以待矣伯子舉東省都試再詘春官  
念恐不及祿養計且謁選太孺人亟止之曰兒  
何不自喜正使未解儒冠何如故諸生時卽不  
念而世者獨不憶而舅爲貴臣顯重猶且稱珠  
玉在側成其它相也吾何以瞑目矣伯子乃不  
敢行竟成進士爲令三載考績受策於朝伯子  
乃奉策書爵父於墓獻章服而焚之痛哭擗號  
觀者隕涕告母於堂獻禕荻而觴之卷鞞稱壽

觀者色喜太孺人亦歡且哀也曰幸哉有子如  
是未亾人下報若翁長無恨矣嘗從霍山官舍  
每聞敲朴聲必詢其故多所譬解一魚一蔬不  
問所自不內諸扉故部使言霍山令廉惠有聲  
最書二十餘上本太孺人教也召入爲郎從之  
長安出爲歸德知府復奉以從至則微病呼醫  
環守救治百方不踰月卒矣生正德十年正月  
十一日卒萬曆二十年十一月十四日得年七  
十有九歲贈公諱相世系行履詳見觀察趙公

所爲誌不著子男三長卽瀾舉庚辰進士任兵部郎中歸德府知府娶陳氏邑人潤女封孺人次濬娶趙氏邑人伯齡女次洙邑諸生娶陳氏邑人志喬女女一適何君錫男僂孫男五夢吉瀾出云吉旋吉皆濬出化吉遇吉皆洙出女六瀾出者一濬出者二洙出者三曾孫女二銘曰蕭然而操汎帶也其爲婦也矐然而佩瓊玖也其爲母也膺膺原隰卜云其吉三紀之後歸于其室考帝命於豐石

明故勅封安人蘇母馬氏墓誌銘

馬安人者長史蘇公潢之配參軍本之母也長史父曰大司馬舜澤先生世家於濮安人父曰寶應王簿純嘏公世家於曹皆巨族也司馬公與寶應公爲中表兄弟平生相善而長史與安人同年生以指腹締盟因委禽焉安人端莊貞靜慧穎多能少時聽父讀書輒解大義長涉經史閑於女訓歸長史數年乃舉參軍後十餘年安人忽病病心悸三年而愈久之又病參軍禱

於泰山請減筭以益母無何復愈又久之長史  
仕爲德王士師叅軍謁選爲內史安人時至長  
安伏臘間復歸視田廬往返者再矣又後五年  
叅軍滿考以士師秩受安人封而德王亦上書  
進士師潢爲長史又一年安人病劇叅軍亟遣  
內子還侍僅及受遺命而長史亦以請急至得  
視其舍惟叅軍不在也訃至擗踊號哭日夜不  
輟聲而手楊駕部狀請銘予傷其意許之方司  
馬公在堂長史兄弟食指數十百人安人奉舅

姑婉順處姊姒和而信待從子及宗黨有恩內  
外宜之而長史從司馬公居塞上又時入長安  
遊諸公卿間及司馬公謝政而長史爲王家郎  
不得洗沐安人日視肩鑷躬操家政時之田間  
課蒼頭奴收穫居常蔬食布衣不爲華侈及長  
史告歸故人賓客從之常滿奉食飲具無闕故  
長史好遊又不視生產家乃大饒綜之安人力  
也旣舉叅軍念無它子爲長史多置佐室舉三  
女子視如叅軍安人性善施予振人之阨如恐

不贍黃縣王大司馬孫貧不能娶走濮陽謁長史安人使叅軍兄事出簪珥助之太常張公沒而家貧其少子季彥方十歲長史字以女延師訓之後爲名士呂王政之姪鬻女於市命叅軍子之以字名家司馬公沒而長公別駕濂爲怨家所阨安人趣長史亟出謁吏爲兄置辯以私財佐之事乃得直皆安人所贊決也安人平生事佛多築橋道及施財爲福利居則燕坐諷經病亟無他語惟誦佛數聲而逝生嘉靖己丑八月五日卒萬曆戊子四月二十六日得年六十歲子男一卽本爲諸生有名用司馬公廕仕前軍都督府經歷娶邢氏太學生太治女封孺人女四長適劉藎卿次適張季彥乙酉舉人卽太常公登高子也次字成大理丞守節從子一幼未聘孫男二長光德聘許氏諸生如松女次光正聘南氏延安府同知兆女女一幼未聘其一則所養呂氏女也予家近濮陽熟大司馬家世長史俠節好義有游閑公子之名尤工書畫及詩叅

大司馬家世長史俠節好義有游閑公子之名尤工書畫及詩叅

軍肖之而孝友至性過絕人遠甚念長史作客安人居遠不來語輒泫然既痛母不及訣也思慕音容欲追圖母像會畫工郭生至語之故泣其夕郭生夢有副禕而至者以質叅軍取筆圖之肖也聞者咸竒其事而予竊怪精誠之至符於神明愈益悲焉卽不能志安人之行如郭生所圖何以慰叅軍思耶乃爲之銘曰 工也貌其形史也貌其名之歿而如生高陽之墟有嵩佳城鬱鬱葱蔥考卜且營用妥爾靈以保爾後生史又爲之銘

明故劉母賈孺人墓誌銘

賈孺人者故鴻臚署丞惕齋劉公配也父南野處士諱只母趙氏世爲平陰人孺人少而莊靜慧婉嫻於姆訓處士竒之惕齋公諱雲龍年甫垂髫以開敏有材列在諸生處士知其必冒以女女之嘉靖辛丑歸於劉氏無何公遊成均丁巳從公仕長安己未從公歸里萬曆癸酉公捐館舍葬於礪山之兆甲午六月三日孺人告終

距生嘉靖癸未九月二十五日得壽七十二歲  
家嗣敬業將以丙申三月十五日啟公之窆以  
祔具狀乞銘予家自大父以來與劉氏世交習  
聞孺人之行知其有可銘焉孺人歸而逮事舅  
姑孱然少也日暮上食烹孰羶薌必潔以虔舅  
姑悅之及從事長安姑夫人耄矣孺人謂公以  
鍾釜之秩闕於溫清卽邀一命而後時其柩公  
何公瞿然稱善再疏請急乃得歸里至則姑夫  
人已病藥物匱匱飽浣濯抑搔罔不親也沒而哀

毀擗擄稱公之容里人曰賢哉婦之孝疑於子  
劉爲邑里大姓食指踰千楊齋公任俠好客遊  
道甚廣門前車轍幾無虛日孺人辨色而作逮  
燭而息內飭管籥外奉俎筵及公之姪若甥拊  
摩嘔喻罔不備也及公之宗黨親識慶吊問遺  
罔不周也里人曰賢哉內之才疑於外及公盛  
年卽世子孫繁衍孺人稱未亾人以勤儉肅雍  
帥作女婦而使諸子跳身遊學造請賢士大夫  
毋替公業間有媵媮輒正色督過不少假貸至

仕學失意則又降顏尉藉惟恐傷之蓋二十餘年如公在焉諸子皆以文雅禮讓稱爲儁流里人曰賢哉母之訓疑於父嗟夫以予遡觀謀記有家之興廢何嘗不由則哉以劉氏之閨冠冕一方施及三世咸由孺人成之女德所繫豈眇小也藉令厥祖若父焦勞力作啟其門戶厥子若孫又能承繼其先以保堂構而閨閣之政無所匡於作述之間亦安能勿替引之更三世如一日乎彼姬姜華貴之宗以侈靡相高而不恤

其緯至隊先人之業者亦豈少哉豕君爲予言孺人天性敦朴不事紛華見里俗環瑱珪襦目尚新巧未嘗一目曰性拙弗能更也此其意識深遠非婦流所及保胙宜家以夫吾故謂孺人可銘也謂其可以訓也子男五敬業四氏學教授娶殷氏繼穆氏遜業邑諸生娶何氏繼李氏進業娶閻氏先卒居業邑諸生娶張氏請業鴻臚寺序班娶何氏女三一適太學生長清李涓一適太學生東平李日遷一適庠生東阿杜

詩側室女二一適東阿訓術于四科一適東平  
王承父孫男六宏基敬業出宏德宏道某某未  
聘遜業出女孫五一敬業出三遜業出一請業  
出曾孫男二未名銘曰 於戲孺人匪其周於  
材而家孰與成匪其豐於德而嗣孰與興教爲  
母師行爲女宗如桓相鮑如光偶鴻趙歲二紀  
歸於其宮坎而雙挺於樂考終以耀於幽局

明故應封宜人徐氏墓誌銘

應封宜人徐氏者遼州太守單公用賓之配鴻  
臚序班民悅之母也世籍東平家居鄆里稟資  
淑令賦性貞閑蚤聆圖史之箴風韞閨閣之秀  
已而結褵著姓作儷文儒更御縞綦躬操井臼  
念仲卿之食貧泣衣効倣勸樂羊之出舍斷機  
陳規夫君以是助也譽茂澤宮籍登天府剖符  
唐邑召伯之所旬宣露冕晉陽尹鐸之所保障  
宜人嚴綜管籥密贊猷爲當在御之瑟琴絃歌  
成化治素絲之紉組襦袴典誼斯以成良牧之  
名稱小君之位矣課徵馴雉室貴已加績試憑



熊巖棲莫挽共奉潘園之御言旋陶令之廬隱  
迹東臯偶龐公之避俗解官南畝儘冀缺之躬  
耕方將指三山以爲期戒雙龍而並御者也霜  
摧護草日薄虞淵卷翟第而不留謝璇室而長  
往以某年月日終於正寢距生某年月日春秋  
六十有四矣卦數已盈箕疇亦備仙遊雖闕懿  
範猶存其有沒而不朽者與蓋嘗歷謀往古永  
惟化原閨門開錫福之基士女兆興家之胙故  
夫儒碩大業雞鳴之微攸資屏翰鴻勳禴菽之

賢是賴豈不珠藏澤媚玉韞山輝珥彤管而流  
芳結佩環而炳訓者哉詳夫宜人節卓有可  
傳略舉其凡是彰四德其奉舅姑也湯藥親嘗  
旨甘豫待迨乎白首婦順彌敦人稱孝焉其棟  
家政也聞雞而興篝燈而績執麤食淡旣貴無  
華人稱恪焉其御叔姒也匱而絕少裕則分餘  
各賦名田使有攸處其睦至矣其誨嗣人也慈  
不掩義愛不忘勞膠序成材登爲內吏其教弘  
矣天鑒厥德神歆其和名壽兼隆祚胤永錫斯

不謂有家之內主斐德之良佐哉民悅將以某  
年月日奉宜人之喪祔於某方之祖兆蒲伏踰  
境展禮乞銘嚙恤因心樂棘秉性予有感焉雖  
圖芳琬琰闔扉之紀闕如而勒石泉臺負斧之  
封在是敬存歲月以慰孝思乃作銘曰 緬彼  
淑君甄靈茂族內訓夙閑壺儀有倣嬪於儒宗  
宜其象服佩管惟諧陳圖允穆敬共夫子祇奉  
尊章詩敦蘋藻禮備琮璜相之績學經術惟光  
相之立政是君大邦皓首同歸百齡衍慶桂樹

騰芳萬里成詠云胡不憖奄及大命晝雉留衣  
翔雲棲舊館草宿新城和琴絕軫雄劍  
孤鳴春蘭倣擘秋菊終榮是鐫爾坎以永嘉聲  
明故待封閭孺人墓誌銘

待封閭孺人者邑侯代郡張君元配也居同里  
城闕閔相輝大父密令績懋循良顯考散官行  
惇德讓母賈太君監察御史世祥姊也孺人毓  
質名閨鐘靈外族三從稟訓七德合章甫當總  
髦之期蚤繕幽閑之性六齡失怙育於大母固

巴川輝韜璧浦潤藏珠受圖史於公宮飭珩璜  
於師氏矣君侯以名家儁少曄著英聲太公博  
求良匹備聆內美遂以六禮聘焉方十有五齡  
結褵就駕至則德宇端莊儀形婉靜孝奉尊章  
夙謹沃盥之節敬共夫子恪修佩悅之容勤以  
宜家星夙而修環瑄儉以節用椎布而斥綺繡  
仁惠以睦閨門肅穆以承禴祀於是舅姑稱其  
朴茂娣姒洽其和柔樂羊嬪之斷機允爲賢相  
桓少君之輓鹿大婉儒風以今方之何多美與

已而君侯高擢賢科觀光 上國捧書大闕蒞  
政名都初宰魯山訪召南之遺化再君朝邑撫  
馮翊之舊疆孺人外嚴筦簞內親甌金勸以勤  
政愛民無負剖符之任贊以嫫好摘隱克照覆  
盆之寃中更內艱號泣擗踴越日不食蒲伏返  
里其孝誠焉至尤難能也昔陶大夫之偶弘獎  
貞風吳晉陵之妻自甘苦節觀之孺人其殆有  
焉萬曆甲辰君有平陰之役鞠莪就道翟第在  
塗二豎忽侵羣方鮮効行至在平境內終於逆

旅君侯慨瑤華之早謝悵石窈之未封怨深孫  
楚之傷痛甚河陽之悼令子千里奔號奉柩還  
葬吏民雪涕父老慘顏藻薦盈城薤歌載路備  
內君之禮數流淑媛之芳徽矣孺人生嘉靖乙  
卯八月二十七日卒萬曆甲辰六月二十五日  
享年五十歲子男一子銘郡庠生娶張氏保定  
尹以重女也女二長適謝少參甫子庠生錫九  
先孺人卒次字吳大司馬嘉會孫指揮某孫男  
女各一俱幼孺人淑資有穆惠問無疆壺政旣

修母儀尤著訓成哲嗣學殖茂修文質斌然蔚  
爲名士非夫教敦輟膳業勗和丸孰能贊燕翼  
之謨衍箕裘之訓若此哉令子以不及面訣痛  
不欲生卜以某月某日奉葬某地先期撥拾淑  
行求銘墓門禮也山當鴈塞旣符白鶴之祥地  
枕牛岡宜勒青鳥之兆鄙人被賢君之聲教感  
棘人之孺悲敬用抽毫俾鐫負斧銘曰 粵代  
之疆實鍾華貫兩族甄靈四星連燦誕育淑貞  
陳圖稟範宋子河魴賢侯攸贊六禮御止百兩

言歸虔恭井曰淑慎箴規承姑奉盟訓子停機  
爰從百里翊德中闈化覃河陰政成陝右聞雞  
告晨懸車飭守珩璜既節厭翟則有胡屆魯郊  
溘焉西首鷺總來歌蜃輻反涉玉律沉灰瑤臺  
閉月御瑟音徂飲捲澤歇傷彼棘人號天泣血  
壁孤掩隧劍隻封墳關迴匹鴈塞落歸雲霜鳥  
慘聽松風愴聞遺德後社百禩流芬

亾兄阜泉處士墓誌銘

阜泉處士者諱慎動字無咎吾伯兄也隱於南

山之麓臨流而築因以自號云于氏自海上西  
遷四世而為先考宗伯府君府君五子妣淑人  
出者四長即伯兄誕伯兄之夕府君歌鹿鳴而  
歸門有樹幟室有懸弧大父大母逆府君而歡  
曰此雙喜也以為小字伯兄生而白皙美好眉  
目如刻畫肖外王父司徒劉公生二歲所府君  
携孥北遊泊舟天津老婢抱伯兄嬉於堤上堤  
上人熟視驚曰此誰家兒何類花馬使君花馬  
使君者外王父也嘗為天津倉曹好騎花馬有

遺愛其地故云稍長從府君於許出就外傳不  
樂學書據案呻吟視日蚤暮及讀稗官小史入  
耳輒記終不復忘也府君淑人相謂長子家督  
固宜使司筦籥此一卷書有兩子在于是仲氏  
叔氏長矣文業已著故府君倚焉而爲伯兄納  
婦使居田間歲登所獲以共膏火伯兄弟弗樂也  
曰丈夫生不成名終不作田家兒從五特蹄泮  
求活日召褐父酒人拍浮笑呼口占歌曲頃刻  
數百語左手持盃右手擊案爲節窮日夜虞樂

未厭而舉闔以內外界之丘嫂故名家女賢有  
心計纖蓄居積筭析秋毫以其故貧而母匱而  
伯兄終不問有無卽疆之行田斗酒豚蹄祝甌  
寔醉矣伯兄長而面頰赭不復如兒時美好而  
簡默敦樸居常不出一語亦無嬉咲惟飲可數  
斗卽河懸齒頰人莫能折其辯醒復默默亦自  
不記何語旣謝儒而農顧時涉獵典記能道古  
今事儒生博聞者不能屈也天性剛介無所阿  
私聞人有不義輒正色攝之或至詬責而不善

記人過卽有嘗侮之者片言立解不著睚眦非分所當得一絲一縷不妄取予諸弟卽以儒顯然其事伯兄甚莊居前起居惟謹毋敢謾語伯兄亦不以其顯故有姁媿色凝然而已伯兄初衣布衣及行遊長安爲受儒士冠帶號爲傅小侯伯兄亦弗樂也曰業已浮湛田里卽着犢鼻何至舉阿堵物博一士冠令市兒睇咲強爲第服斥不復御而衣其故布衣日飲賓客及門輒忝自閉不稱仕人兄也始伯兄年二十所卽

舉長女已以酒病病可三十年不復孕育及年五十病劇而遇良醫盡除其故所苦而不復能飲已乃復舉三女然竟不男命也伯兄沒時予在長安累疏上請未得俞命乃先使紹綬二姪葬兄嫂於祖兆踰歲得歸始伏其墓一哭翦棘而納銘焉丘嫂陳氏者聞儒鐵峰先生職女也夙稟內訓處舅姑娣姒無所失禮是生長女適李撫軍子維喬有甥男女七人佐室舉次女適故家子王建都兄生嘉靖戊子九月十二日卒

萬曆戊子八月八日得年六十一歲嫂生嘉靖  
壬辰二月二十四日卒萬曆丁亥三月二十七  
日得年五十六歲伯兄之滿六十稱壽宗伯北  
海馮公觴之其辭曰于長公達人非酒人也晉  
初諸賢以酒自放散髮把臂於竹林間而世目  
之曰達陶彭澤故有高陽之致已而止酒作止  
酒詩而世亦目之曰達於長公何居焉夫晉初  
諸賢其所有寄也彭澤則幾無待矣長公學不  
慕儒隱不謀生入貲爲儒士例得受秩棄而去  
之倘亦有漢陰漆園之指耶故達人非酒人也  
予因而爲銘曰 其生而不事也自以爲適其  
沒而不烝也世以爲戚已之所適而世之所怛  
然而愁世之所戚而已之所睿然而休此其與  
人者睽而與天者遊與故曰達人

亡兄太學都講航隱先生墓誌銘

于慎行曰嗟乎此吾兄航隱先生之墓也吾知  
吾兄吾不誌吾兄誰誌吾兄者誌曰先生諱慎  
思字無妄航隱其寓號也吾家故居海上西遷



四世而爲先宗伯府君府君舉五子先淑人出者四焉長曰無咎次卽先生次鄉進士無擇次乃不肖行先淑人娠時夢人遺襪衫一領曰此蘇東坡公所服也寤而誕先生遂以爲小字云先生生有異質跌宕負奇氣年十六七卽徧讀羣書日課一帙凡誦數十萬言率能記憶工爲文賦尤嗜離騷亦好兵家笑從府君遊隴西過咸陽渭水間見古宮闕陵墓輒下馬披榛踟躕四顧洒涕悲歌而去同行者異之不敢詰也隴

西守舍壁中得諸葛八陣圖法輒爲註解及著安邊書數卷簡練揣摩慨然有用世之志府君覽之私喜然外不稱善也曰兒孱然垂髫當以經術自致安用金版六弋書爲方是時大司馬曾公銑經制西邊建議復古河南地先生輒懷其兵書馳一騎跳往將叩轅門獻之府君趣使追焉曰姑毋謁制府且見張中丞張中丞者名子立黃人適戍塞上見先生與語大奇之乃曰下吏子謁制府非體敗乃公事留與論文藝及

談古今事上下數千載不能難之書報府君曰  
吾忘年小友君家千里駒也明年遣歸就室與  
無擇同遊學宮應已酉鄉試先生年十九無擇  
十四矣故事士子入闈解衣裸跣陳兵夾索先  
生嘆曰此錄囚耳安取禮士念欲弗入恐見不  
能入而著義七篇楷書如法故爲不具草出則  
走城西伎館大醉累日長歌而歸誓不從諸生  
試矣後三年壬子無擇偕計上府君在平涼得  
報怡然曰少者旣舉長者可坐待也歸而督課

先生先生亦自念已大無致身策不得不俛首  
一經於是始取帖括諸書焚膏呻吟然自其少  
年時獨好古文詞卽勉爲舉子業終不能工卽  
先生自謂工人亦弗善也又後數年不肖行亦  
舉於鄉府君不甚爲行喜而流涕撫先生曰嗟  
吾兒別足折肱一何屢矣及不肖行仕二十年  
先生且老又病酒稍衰猶屣履諸生中不肖行  
心悲之從容說曰嗟嗟吾兄卽今衣紫垂魚貴  
顯當世才如兄者幾人然而不遇命也胡不強

飲著書規不朽之業而自苦如此先生仰天太  
息涕下沾纓曰君視而兄何若無妄魯國男子  
不願使里中兒目爲貴人昆弟顧無如命何耳  
吾聞太學羣天下士士從長安都試詞林諸公  
能識之且徃觀乎及歲丁亥乃馳至長安入貲  
遊太學從博士諸生一再摳衣輒憤邑不自勝  
然業已就之無如何也方先生至都下時已病  
臞矣而值予有寒病數日不食先生日夜守視  
呼醫具藥療治百方予幸少瘳而先生病又劇

予從床蓐間蒲伏守視先生供具湯藥如其護  
予狀而先生竟不起矣時萬曆戊子正月六日  
也距生嘉靖辛卯十一月十二日得年五十八  
歲彌留讒語猶作揮金教射狀曰兵法如是含  
笑而瞑其英氣可想矣閣部諸公聞先生客沒  
皆過予邸臨弔或爲歌詩挽之都門送喪車馬  
滿路旁云先是兄無擇卒且二十餘年弟慎由  
以丙戌卒未葬至是先生又卒其年八月長兄  
無咎又卒不出三歲連遭同產之喪三家門殄

瘁形影相依蓋予於是決歸志矣累疏請告具以狀聞 上報曰大臣爲國母以家爲念凡十二請乃賜歸其明年壬辰十一月十六日葬先生於祖兆嫂陳氏率子縈以誌請嗟乎吾知吾兄吾不誌吾兄誰誌吾兄者操毫隕涕不能爲辭聊著大都焉嫂陳氏者河州大守怡菴公鯤女也生二子皆夭乃以從子縈嗣先娶王氏吏目嘉言女繼劉氏生員笏女中丞範東公孫也老而側室舉一女適東平解如某亦名家子而

縈有子元燠及二女云先生爲人魁梧長大渥顏豐頤談說經史摩畫世事奇偉不凡食酒至數斗扼腕語難髮上指冠里兒多柳榆之不知其有所出也常以爲經國當知大體不爲齷齪小文行丘在朝賞罰用財如土母拘於苛法慕張忠定陳同甫之爲人而持論激昂有蘇長公之氣夢信非偶也爲文奧雅雄渾取法遷史而不事模擬爲一家言詩工長歌喜孫太白常樓居之調至爲騷賦沈酣楚聲尤非俗好所及而

近體聲病則時有出入焉亦間爲元人樂府大有風韻多從狹邪中得之吾常欲效其體先生笑曰若拘拘小儒紙上作臺閣官樣安能爲此性行豪爽不修城府持已應物動法古人而不好講學常曰寧爲真士夫不爲假道學少時有所論撰自署屠龍子言其無所用也有怨家聞而詬曰此少年子欲爲不軌將上書告之識者爲之絕倒于慎行曰吾兩兄皆異才也先生博物閱覽貫穿百家而精麗少謝無擇無擇文詞

瓌鉅揮翰輒數千言而多識不及先生然皆文苑之英也落魄不偶未竟其業爲長恨耳不肖未齒失恃兩兄實訓成之幸以文學致身陸沈金馬門中而兩兄懷瑾握瑜不博一第天之生才誠何心哉先生著述可十餘種校其一二梓之他如卷之四也卷之五口 翠巖連綿崆峒造天丞雲漫先生之所蓄耶龍蟠之淵灑而爲川瀉滴涓涓先生之所出耶山水之間有丘有園蘅臯石田先生之所隱耶其右有阡烈考宅焉祔

築巋然先生之所歸耶生於此乎廬化於此乎  
居其谷口之間其樵里之墟谷嗟乎是魯國之  
文儒也

亡兄鄉貢進士冲白先生墓誌銘

冲白先生者先宗伯府君第三子也諱慎言字  
無擇先妣淑人以嘉靖丙申三月二日誕先生  
於里舍生而風神淵瑩肌肉玉雪狀如好女府  
君淑人相與陰奇之弱不好弄伊吾一編目無  
旁睨食時有所思憶或至失匕其篤如此年甫

十四列爲學官弟子卽應省試御史讀其文輒  
見嗟異議且入彀參政豫章萬公訝其太少曰  
此兒國器毋遽以一第盈之而以其卷傳覽諸  
公聲燁然課濟上矣明年府君以靜寧考績過  
家西上先生從諸兄送至壽長爲歌詩數闋悽  
婉動人明年省府君於隴過關洛遺墟多所嘯  
詠見者驚訝不謂垂髫生作也明年壬子年十  
有七歲歸自關中詣試省闈故大司空豫章李  
公爲濟南太守得其卷奇之以呈御史御史馮

公舉爲高第時尚少不知飲及宴賜之卮酒受而幾墮諸公相顧笑曰是尚不能捉酒卮卽偕計乎是年府君以郡丞入覲聞喜之夕上書自免明年癸丑都試報罷府君設宴於庭爲先生冠如古三加禮受室邑之李氏又二年乙卯淑人捐棄其後己未壬戌再上再罷而府君亦逝迨歲甲子先生有所憤邑而病病幾三月以七月十二日卒年二十有九邑里傳聞無親疎大小咸頓膺涕泣憐之以先生才高不及成也先

生爲人修長玉立風骨矯矯天才警敏落筆千言河傾泉湧紙上作刺刺聲其爲制義七首率不至日中而就未嘗塗改或操翰牘求言卽問作何書法且撰且書已付其人去亦復不自記也外叔祖中丞劉公故善章草先生能繼其法篆隸行楷並皆精妙其爲古文辭莊麗適美喜作六朝俳體然自謂非其至也歌詩爽朗不羣飄然有凌雲氣而矩裁未成天不假年嘉禾不秀豈不惜哉平生清修莊慎步趨繩矩潛心理

性雅慕越中先生語與我在平孟我疆氏同事陳  
鐵峰公陳鐵峰公者名職里中耆宿府君所善  
友也好學嗜古與先生爲忘年交講業汶水之  
上而先生風度閑遠志趣高華視世俗浮沉了  
不介意少時歸自關中從盟津渡河中流風浪  
大作一舟晷眇先生閉目危坐神色宴然船人  
異之既濟則曰此少年郎君必福人也性至孝  
友事府君淑人承顏虞侍如恐不及居喪哭泣  
極哀寢處苦凶動如古法事兄御弟恩義藹然

淑人在殯時予年十歲衰而寢于階時方盛暑  
先生踞坐其旁潛爲揮扇婢僕竊窺有流涕者  
予覺而牽袂啼也府君爲吏薦旣自免歸家日  
貧窶先生業舉於鄉杜門修業或至日宴不炊  
終未嘗請間官長有所關說邑君董公知之有  
束矢於庭者令曰吾懸二尺待汝能得丁孝廉  
一札吾貴汝矢其人懷金及門先生大恨曰大  
夫以予生何若至有赭衣奉璧汗吾赫蹏謝邑  
君弗復見先生厭世俗別號舉時尚幼以字刻



籍其後顏冲白於齋里人因而號之四方士友  
至今不知也迹其所自操持矚然潔白不離世  
之滋垢所謂好學篤行君子耶方先生舉省試  
行甚少耳其後十年而行亦舉然其遊學宮皆  
以十四對公車皆以十七名第又相符也東人  
士指目羨之行也幸荷先靈叨有一第以及茲  
華髮而先生之宰木拱矣天平悲哉先生卒時  
有二子長者曰系年八歲次者曰紹年四歲其  
後系長爲諸生娶秦經歷亮女已而婦沒再娶

平陰姜氏間歲生男男未彌月系沒今其孤永  
勳長聘在平張太守女也紹邑諸生娶李照磨  
茂蘭女有一子一女子曰鴻勳聘平陰趙茂才  
女女字喬省元宗啟子某後尚未艾云先生沒  
且五年而予成進士又五年以史官謁歸葬先  
生於祖兆彼時子少固不知銘也後往來長安  
欲爲求名德之辭侵尋未果而予已懸車老矣  
念先生奇質姱修年不待壯無所表白於世誠  
痛惜之使紹龔石墓左爲書生平大畧因爲蒐

羅遺草僅得三卷梓諸家塾俾子孫藏焉慎行  
曰予爲吾兄誌蓋有所不忍書云以兄之才美  
第今僅得下壽有所論著成一家言垂之不朽  
浮沉不足道也蘭摧玉折匪降自天齊志韶年  
嗚悲終古尚何言哉夫終童請纓於漢廷文考  
摘葩於魯殿子安高步於四子長吉擢穎於七  
齡莫不放瓊琚之辭儵鸞龍之彩然皆年不逮  
室位不登朝蚤發夙零爲世長恨然則懷竒體  
異之士中道而閉者衆矣柰何天平銘曰 有

珠出海其光則瑾不佩而煨嗟嗟悲乎有璧耀  
淵白虹在天奉而隊旃嗟嗟悲乎有植於庭瓊  
敷玉英未秋而零嗟嗟悲乎有蘭在唐從風飄  
揚炎天用霜嗟嗟悲乎有封宰如自我考居弟  
銘則書有雲有裔以衍厥間嗟嗟悲乎

以弟稚川茂才墓誌銘

予仕長安旣以在原之戚屢疏乞骸三年而得  
請歸之踰歲葬兄無妄踰月葬弟無欺於是號  
而告府君墓曰天平三兄一弟皆送入土矣獨

兒隻身在爾而姪綬以誌請收涕而書其石曰  
少弟無欺者名慎由庶母黎孺人出也以府君  
別號號爲稚川始先妣淑人有四男一女皆已  
成立而會府君客遊隴西卜造金城孺人在侍  
踰年歸里舉弟於舍府君爲其少也貌清而慧  
絕鍾愛之淑人之愛又甚朝夕抱弄膝上口棗  
粟啖之夜則寘諸懷而臥時啼不休輒爲披衣  
起坐至申旦不寢孺人性卞善折挺笞兒淑人  
聞輒譙之若母敢笞吾兒也出則携以自隨時

詫內黨此吾老生兒兄姊以淑人愛之故亦忘  
其異母出者弟生五歲而淑人沒諸兄皆已有  
室惟余總角携弟同臥起也又七年府君沒而  
予亦有室弟乃從其母居當府君沒時弟年十  
有三歲已能爲經義辭甚可觀其後四年而弟  
爲博士徒自以少孤且貧日夜淬厲文聲翹然  
督學使者按部數居首第受廩於庠卽諸生指  
數當舉者未嘗不首及吾弟也往者仲兄無妄  
携兄無擇同試無擇先舉已而携予同試予又

先舉已而携弟同試試危舉者數也而仲兄竟不遂則嘆曰嗟乎吾三十年中携三弟試何偃蹇若此哉久之弟以善酒病百方不痊竟先仲兄沒矣弟之病也以丙戌九月予新拜南宮報至弟有起色而予聞弟之病且亟發筮占之其卦遇革筮人曰不吉在月二十已而果然距生嘉靖庚戌八月十九日得年三十七歲嗟乎吾弟病不視其藥沒不視其含有兄如此何哉始府君與博士李先生同舍遊甚歡李先生者名

東先文雅士也兩家俱孕約爲婚姻已果一男一女遂聘李氏凡舉子女數人子男曰綬邑諸生娶士族趙廷言女女一曰墨適中丞侯公孫承爵孫男七元燦生員娶廩貢生殷三捷女元燁生員娶生員謝公蔭女元美聘生員張儒行女元熙聘東安典史張默女元燭聘戎政千總李彙克女元煦聘太學生仇思欽女元焜未聘孫女二一適曹省元應科子生員宗瑋一適生員邢過位子祚昌先是府君既塋生息不蕃議

改卜者久之竟以寢成孔安不忍震動而止及弟之葬乃從江南名師爲宅吉壤於祖兆之東泐曰必昌其後嗟乎人之禍福受命於地邪受命於天邪盡吾心爾矣穀山子曰吾爲弟慎由誌而有所甚痛於府君云府君兩爲州牧一爲郡丞歸之日蕭然四壁立爾淑人卽世諸兄析產舉不得名一錢里人固不能無妄意也其後弟長而貧貧至不厭糠覈乃知無有乎爾嗟乎佩二千石印綬且踰一紀而有所哀憐少子不克帝饑庶吏安可爲乎銘曰 母之慈喚而穀女考之庶貧而疚女昆之永懷宅吉而覆女有昊之盈虛不壽女而右女則繩繩爾後哉

設城山館文集卷二



